

摘藻堂四庫全書薈要

史部

欽定四庫全書薈要卷八千三百二十七

史部

欽定大清會典卷九十八

前鋒統領

統領左右翼各一人

或以王公大臣兼領

掌本翼四旗前鋒

之政令前鋒叅領前鋒侍衛左右翼各八人署前鋒叅領各四人掌替率前鋒警蹕宿衛每翼隨印協理事務前鋒叅領侍衛各一人前鋒校二人筆帖式二人

凡營制鑲黃正白鑲白正藍為左翼正黃正紅鑲
紅鑲藍為右翼前鋒校左右翼各四十八人每旗
十有二人為一隊烏槍什長左右翼各二十四人
隊長如之前鋒八旗滿洲蒙古每佐領二人本旗
教場操演步射月六次騎射歲二次或四次三年
考驗一次又於左右翼內各分前鋒之半兼習烏
槍月演十次均由統領督率叅衛校長如法訓練
以定黜陟

凡卡倫距

御營一二里外安設立前鋒旗二以為門戶左右以次
列帳日則瞭望夜則守衛以前鋒叅領前鋒侍衛
共八人前鋒校前鋒共百二十人董其役犯卡倫
者坐以軍法

凡升除統領由兵部列名奏請

簡命筆帖式由吏部補用外前鋒叅領員闕於本旗護
軍叅領一二等侍衛宗室將軍一二等侍衛前鋒

侍衛內遴選六人或七人前鋒侍衛員闕以署前
鋒叅領一人列於前再於本旗二三等侍衛護衛
副護軍叅領前鋒校內遴選五人或六人署前鋒
叅領員闕於本翼前鋒校內遴選正陪前鋒校員
闕於本旗鳥槍什長隊長內遴選正陪若闕多人
少於前鋒內每闕遴選四人或五人均由統領引
見補授協理事務前鋒叅領侍衛員闕於本翼前鋒叅
領侍衛內各遴選正陪引

見補授隨印前鋒校闕於本翼前鋒校內選委前鋒鳥槍什長闕於本旗隊長隊長闕於本旗前鋒各遴選充補

凡拔補前鋒由統領會本旗護軍統領於護軍驍騎執事人教養兵閑散壯丁內遴選補用

凡兩翼前鋒統領遇一人奉差外出者即以未出差之人兼攝如二人均差奏請

簡署

護軍統領

護軍統領每旗一人掌護軍之政令護軍叅領每旗滿洲十人蒙古四人內司鑰長署司鑰長各一人副護軍叅領如叅領之數護軍校署護軍叅領每旗七人隨印協理事務護軍叅領副護軍叅領各一人護軍校各二人筆帖式各二人門筆帖式鑲黃正黃正白三旗各十人護軍校八旗滿洲蒙古每佐領各一人護軍每佐領各十有七人

凡宿衛

景運門統領一人司鑰長一人護軍校三人門筆帖式二人閱門籍護軍

即巴克什

一人護軍十有七人

隆宗門協理事務護軍叅領一人護軍叅領二人護軍校三人門筆帖式一人閱門籍護軍一人護軍十有七人

後左門

後右門各護軍叅領一人護軍校三人門筆帖式一

人閱門籍護軍一人護軍十有二人

左翼門

右翼門各護軍校二人閱門籍護軍一人護軍八人

中左門

中右門各護軍校二人閱門籍護軍二人護軍八人

太和殿

體仁閣

弘義閣

昭德門

貞度門各護軍校二人護軍八人

太和門左右門各親軍校二人親軍八人

協和門

熙和門各護軍校二人護軍八人

中和殿護軍校二人護軍三人東廊西廊各護軍校
一人護軍四人

蒼震門護軍叅領一人護軍校三人閤門籍護軍二

人護軍十有二人

啟祥門護軍叅領一人護軍校三人閱門籍護軍一人護軍十有二人

吉祥門西北隅銀庫各護軍叅領一人護軍校二人
護軍八人

凝華門

中正殿後門東北隅東南隅

文華殿箭亭

紫禁四門內磴道柵欄各護軍校二人護軍八人防
範火班護軍校一人護軍七人

午門護軍叅領一人左門閱門籍護軍二人左右門
各護軍校三人護軍十有二人

東華門

西華門

神武門各護軍叅領一人護軍校四人閱門籍護軍
二人護軍十有六人

北上門護軍校二人護軍八人恭遇

車駕巡幸東華門西華門神武門各增統領或協理事務前鋒護軍叅領一人以鑲黃正黃正白三旗官軍按日分班直宿每班五百二十五人

闕左門司鑰長一人護軍校一人護軍九人

闕右門護軍叅領一人護軍校一人護軍十人

端門

天安門

大清門各護軍叅領一人護軍校二人護軍十有八人

紫禁城外周環十六堆舖各叅領一人護軍校一人
護軍九人四柵闌各護軍校一人護軍九人以正
紅鑲白鑲紅正藍鑲藍五旗官軍分班直宿每班
三百有一人統隸於

景運門直班統領稽察曠誤者論如法

凡禁門啟門各以其時

車駕出入啟中門以

景運門直班統領率

隆宗門叅領祇承其事並令護軍清蹕每夕

景運門直宿司鑰長自

後左門後右門

中左門中右門

左翼門右翼門

太和門

昭德門

貞度門以次驗視局鑄

午門以

隆宗門護軍叅領

東華門以

蒼震門護軍叅領

西華門以

啓祥門護軍叅領

神武門以

吉祥門護軍叅領分視局鑄畢各遣護軍校納鑰於司鑰長司鑰長受驗諸門鑰彙貯於篋復加局鑄詰朝各門校以次領鑰啓門

紫禁城外各門啓閉由

闕左門司鑰長委護軍叅領一人驗視局鑄

紫禁城內

景運門

隆宗門

東華門

西華門

神武門各

頒陰文合符如遇夜間有

旨啓門

大內出陽文合符該護軍叅領即取陰文合符驗明
啓鑰其

卷九十八
蒼震門

啓祥門等門報統領齋陰文合符至門與陽文合符
比驗迺啓均於次日奏

聞

凡門禁百官執事人出入

紫禁城門皆憑門籍籍內備書爵秩姓名於經由之
門各置一通擅入及縱入者並論

凡禁門軍器

紫禁城內各門各堆鋪及

午門

東華門

西華門

神武門外班房均陳列橐鞬弓矢長槍之屬弓日令
弓人張弛矢旬日簡視必利必整槍及毀歲終皆
易以新橐鞬以八年弓矢以十年槍以十五年移
文武備院更換一次損失者論

凡扈蹕恭遇

親祀

壇

廟統領一人同內大臣侍衛於豹尾班後管束

駕宿齋宮

南郊

輦路清蹕護軍叅領三十二人護軍校護軍八百人神樂署周圍清蹕護軍叅領八人護軍校護軍八十

人

園丘外清蹕叅領二人護軍校護軍二十人門五以統領
一人協理事務叅領二人護軍叅領五人司鑰長
二人護軍校護軍百人宿衛設十四堆鋪以護軍
叅領六人護軍校護軍百五十四人巡守

北郊

輦路清蹕與

南郊同

壇外清蹕護軍叅領十有一人護軍校護軍百有十人門
四以統領一人協理事務叅領二人司鑰長二人
護軍叅領四人護軍校護軍八十人宿衛設十一
堆鋪以護軍叅領八人護軍校護軍百有十人巡
守

車駕經行城內以上三旗官軍城外以八旗官軍衛道
清蹕均由

景運門直班統領計程遠近隨時酌委以統領一人

率護軍叅領一人稽察

回鑾亦如之

凡

行在宿衛扈蹕以統領三人營總三人掌其政令

御營宿衛網城三門以上三旗護軍叅領六人護軍校
護軍六十人設九堆鋪以上三旗護軍叅領九人
護軍校護軍九十人外連帳四門以下五旗護軍
叅領八人護軍校護軍八十人設四堆鋪以下五

旗護軍叅領四人護軍校護軍四十人警蹕以八
旗護軍叅領八人護軍校護軍百二十人頓營守
衛以護軍叅領二人護軍校護軍四十人每日扈
從及合圍官軍並於八旗內酌簡

凡訓練月以初二初六十一十六二十一二十六
等日步射六次歲以春秋擇甲冑騎射各一次或
二次三年考驗一次均由統領督率叅校軍士如
法訓練以嚴黜陟

凡升除統領由兵部列名奏請

簡用筆帖式咨吏部考取補用外協理事務叅領員闕
於護軍叅領內司鑰長署司鑰長員闕於護軍前
鋒烏槍叅領內護軍叅領員闕於本旗驍騎叅領
冠軍雲麾使一二等侍衛護衛前鋒侍衛副護軍
叅領宗室一二等侍衛鎮國護國等將軍子男輕
車都尉等官內選六人或七人副護軍叅領員闕
以署護軍叅領一人列於前再於本旗副驍騎叅

領雲麾使治儀正二三等侍衛護衛宗室二三等
侍衛奉國奉恩將軍佐領騎都尉雲騎尉等官內
選二人並於護軍校內選一人署護軍叅領員闕
於本旗護軍校內均由該統領會本翼四旗統領
遴選正陪引

見補授護軍校員關於本佐領下前鋒親軍護軍領催
及食四兩餉銀之執事人內遴選二人擬定正陪
由該旗統領會同本翼四旗統領引

見補授

凡拔補護軍由該統領會同本旗都統於本佐領下驍騎執事人教養兵步軍閑散壯丁內遴選善於國語弓馬嫻熟人材壯健者補用

凡官員親隨兵養廉支借俸銀官軍優恤均與八旗驍騎營同

嚮導

總統無定員以前鋒統領護軍統領八旗副都統

兼理於八旗前鋒營護軍營內選叅領侍衛四人
前鋒校護軍校前鋒護軍六人佐之恭遇

時巡省方以嚮導總統一人先期率官校詣

車駕經行之地周覽山川通橋梁夷險隘計程入告

駕行佩橐鞬前導既駐

蹕以次日程塗及駐

蹕之所奏

聞交

行在兵部曉諭闔營

回鑾亦如之○駐蹕

御營及頓營看城均由嚮導總統先期指示飭所在有
司修築營盤

欽定大清會典卷九十八

欽定四庫全書薈要卷八千三百二十八

史部

欽定大清會典卷九十九

步軍統領

提督九門巡捕三營步軍統領一人掌管門禁鎖鑰統率八旗步軍三營將備以肅清

輦轂協理刑名部臣一人掌叅酌刑律所屬文職十有七人武職六百六十人

員外郎二人主事二人掌勾檢旗營簿書○司務

一人掌稽察簿書兼理俸餉○筆帖式十有二人
掌文移繙譯

左右翼步軍翼尉各一人八旗步軍協尉副尉各
二十四人掌董率守衛巡警掃除步軍尉每旗滿
洲二十四人蒙古漢軍各九人委署步軍尉每旗
滿洲各五人蒙古漢軍各二人掌分汛警夜清道
詰姦捕盜步軍尉滿洲每旗各三人蒙古漢軍每
旗各一人

步軍尉
遠委

緝捕盜賊稽察姦宄領催二千

三十一人步軍萬七千八百四十七人

養廉名糧
六百八人

門軍六百四十
人不入數內

城門領內九門每門二人外七門

每門一人城門吏同門千總內外門每門均二人

掌嚴啓閉出入以稽詐偽

信礮總管一人五品官八旗各一人掌監守白塔

信礮

中南北三營叅將各一人游擊各一人掌訓練弁
兵分駐巡緝守備十有九人千總十有五人把總

三十人掌分守營汛緝捕姦匪外委千總十有五
人外委把總二十六人分汛協防隨營差委馬兵
千四百四十人步兵三千五百六十人

內養廉公
費名糧扣

除馬兵百七十六人
步兵三百六十四人

凡本屬文武官升除員外郎員闕咨吏部轉行各
部院遴選主事移送與本衙門主事同簡選主事
於司務筆帖式內選擬正陪由統領引

見補授司務於筆帖式內選擬正陪咨送吏部筆帖式

咨吏部行各部院保送筆帖式簡選擬調由吏部引

見補授○步軍翼尉會該翼滿洲都統護軍統領各選驍騎叅領護軍叅領一人引

見補授協尉於該旗城門領副尉步軍尉內選擬如步軍營不得其人會同該旗都統於男以下騎都尉以上世爵內選擬正陪副尉於該旗步軍尉等官內選擬步軍尉會該旗都統於委署步軍尉雲騎

尉前鋒護軍驍騎諸校城門吏隨旗行走之五六七八品官及調旗部員內選擬正陪委署步軍尉會同該旗都統於雲騎尉護軍驍騎諸校及隨旗行走之五六七八品官內選擬均引

見補授捕盜步軍尉於該旗步軍尉內遴委○城門領內九門以八旗滿洲外七門以八旗漢軍均於該旗步軍副尉步軍尉內選擬步軍營無可升授者會該旗於騎都尉雲騎尉內選擬正陪城門吏由

該旗都統於前鋒護軍領催驍騎內選擬均引

見補授門千總移咨兵部銓補○監守信礮總管由八旗直年都統等以八旗三四品世爵及監守信礮官內簡選十人引

見補授監守信礮五品官該旗都統於騎都尉雲騎尉護軍驍騎校及六七八品官內擬正陪引

見補授○巡捕三營叅將游擊守備以次升補均簡選引

見補授千總以把總選補把總以外委千把總及馬兵
並發營補用之人拔補外委千把總皆循次拔補

凡拔補軍士步軍領催於該旗步軍內拔補步軍
咨該旗冊送正身閑散壯丁及旗下家人選補捕

盜步軍

三百二十人
在步軍數內

於該旗步軍內拔補城門驍

騎三百人內九門以滿洲蒙古外七門以漢軍各
咨取該旗年壯驍騎調補門軍六百四十人內九
門以滿洲蒙古外七門以漢軍各於該旗步軍內

選補均不得以教養兵充選礮手每門各二人內
九門咨取漢軍旗礮手外七門以該門城門驍騎
各選取充補監守信礮領催四人礮手八人咨該
旗於漢軍領催礮手內移送步軍十有六人即以
漢軍旗步軍選驗調補○三營馬兵咨取八旗漢
軍內府閑散壯丁與召募良民一同選充其開戶
人充兵後有技優能効力者以拔補外委千把總
為限○番捕人役皆召募民人充當

凡城門朝啟以昧爽夕閉以日入

皇城諸門自

大清天安端門而外皆屬八旗步軍官兵守衛遇
朝會之期委步軍協尉副尉各四人步軍尉十有六
人酌撥步軍於

大清門內

午門外

御道左右巡警掃除逐止從役又委捕盜步軍尉四

人於

長安左右門外稽察出入

京城諸門頒陰文合符於步軍統領及正陽西直二城門領如遇夜閒有

旨啟門

大內出陽文合符正陽西直二城門領即取陰文合符驗明啟鑰其餘各門報統領齎陰文合符至門與持至之陽文合符比驗迺啟次日奏

聞朝祭

御門及

行幸駐蹕王公百官有應早啟城門出入者兵部覈所
經由限以時刻轉行統領傳知各門早啟平時啟
閉均循常制

郊祀先一日

駕宿齋宮統領於附近城門內翼尉一人協尉副尉四
人於祀所直宿外垣以內八旗步軍設汛巡警外

垣以外三營弁兵設汛稽察恭遇

時巡省方奏請翼尉一人扈蹕仍委協尉一人筆帖式守
備千總把總各一人八旗捕盜步軍尉八人健步
官十人三營馬步軍捕役六七十人隨從

皇城及正陽崇文宣武門內外通衢要道均增置汛
防別委旗營官弁倍常巡警各門亦嚴加守衛埃
回鑾日迺撤

凡守衛

皇城内專隸八旗滿洲分汛九十列柵一百十有六
皇城外八旗滿洲蒙古漢軍分汛六百二十有五列
柵千一百九十有九均令步軍尉督率步軍按所
轄地界防守稽察夜則擊柝傳籌巡更黎明廼止
外城分隸三營中營所屬馬兵汛五十有四步兵
汛五十有五列柵百九十有三南營所屬馬兵汛
六十有二步兵汛八十有二列柵百四十有五北
營所屬馬兵汛四十有九步兵汛四十列柵百有

二各統以叅游轄以專汛守備分防以千把總率
兵巡警如前○內九門城上設步軍汛八十七所
恭遇

行幸駐蹕增八旗驍騎汛四十八所如

車駕省方巡狩撒步軍分防通衢城上汛守悉易以八
旗驍騎外七門城上設汛四十三所營兵更番防
守轄以千把總三人○

圓明園八旗步軍汛凡五十三營馬兵汛十有五步

兵汛五十有二○

靜明園三營馬兵汛十有二○

靜宜園三營馬兵汛一步兵汛十西山小屯村及冷泉各設三營馬兵汛一步兵汛四凡遇

駐蹕叅將一人率各汛守備於通衢千把總等於僻巷晝夜嚴謹稽巡

乘輿經由內外城統領率所部官兵先時除道設幃衛巷以蹕行人

凡緝姦

京城內外遇有強竊橫惡負罪潛逃私毀私鑄賭博
鬪毆者均責成八旗三營專汛兼轄等官隨時緝
獲按名議叙有差逾限不獲諱匿不報軍捕受財
縱放該管官扶同徇隱者並論如法

凡斷罪八旗三營緝獲違禁犯法之民罪止笞杖
者即時審斷發落不得拘留徒罪以上送刑部審
擬旗人犯姦應坐流罪折枷責以下者依律斷結

罪至死會三法司滿堂官審擬具奏

凡訓練八旗步軍習步射城門驍騎習鳥槍均春秋操練步軍翼尉同城門領更番考閱內九門設大礮各十外七門設大礮各五每門礮手二名三營叅將游擊月考其屬之弓矢守備千總把總各練汛兵春秋習鳥槍與城門驍騎同

凡優卹給入官房千四百三十四間地四百畝有奇歲收租銀以為辦差公費及賞賚番捕之用○

官有養廉武職給兵糧統領馬兵九名翼尉四名
協尉步軍三名副尉二名步軍尉委署步軍尉各
一名叅將馬八步十有二游擊馬六步九守備馬
三步五千總馬一步四把總馬一步三外委千把
總均步一每營設公費名糧馬兵步兵各五名○
文職給以房租員外郎主事司務皆歲支銀百兩
筆帖式八十兩○軍有卹賞八旗步軍婚喪之事

於本旗優卹銀內賞給

詳見八旗典則

三營軍士以房地

餘租九千兩生息喪葬卹以四兩婚嫁賞以二兩
○步軍尉隨圍捕盜步軍尉差委緝捕視其日之
久暫給路費三十兩或二十兩於生息銀內動支
步軍差巡墊道每旗統備帳房四十架俾避雨雪
於工部咨取

凡禁令

京城內傳更閉柵王公官民皆禁行走惟奉

旨差遣各部院傳事民間婚喪祭祀或疾病產婉延醫

召媼均詢明聽出若無故夜行及弁兵踈縱與非
時妄拿者論如律○火災隨時防範偶遇有失官
兵各按旗營界址即時赴救曠誤者論○五城米
廠平糶禁商賈囤販肩負數寡者聽○送葬者禁
出正陽門夏日至祭

北郊春秋祀

東西郊臨期朝陽阜城安定諸門禁亦如之○八旗官
軍旣於優劇內外城闌閹侵占街塗送死者用火

化三冬風高演放起火以及番捕擅設白役偵探
部院事端擾害良善者皆有嚴禁

欽定大清會典卷九十九

欽定四庫全書薈要卷八千三百二十九

史部

欽定大清會典卷一百

火器營

總統六人

以王公領侍衛內大臣都統前鋒護軍各統領兼任

掌教演火器

之政令八旗鳥槍護軍叅領十有六人旗各二人

鳥槍驍騎叅領二十四人滿洲旗各二人蒙古旗

各一人管鳥槍散秩官五十六人管礮散秩官四

十人鳥槍護軍校一百十有二人鳥槍驍騎校一

百十有二人管礮驍騎校四十人八旗滿洲蒙古
每佐領下鳥槍護軍三人鳥槍驍騎四人礮驍騎

一人

以上鳥槍護軍叅領為該營專設官
餘均以八旗滿洲蒙古官兵兼任

凡訓練歲於七月十七日始

遇閏七月即于閏
七月十七日為始至

次年四月十八日止

封印日至開
印日暫停

月以初四初九

十四十九二十四二十九等六日演礮初二初七

十二十七二十二二十七等六日演鳥槍初六十

六二十六等三日校射春秋會操於安定門外教

場大操日隨大隊列陣合操於仰善窪每年秋後奏請於蘆溝橋演放子母礮得

旨率官軍前往蘆溝橋演放十日開演日一應祭礮儀節均與漢軍同

圓明園八旗護軍營

總統無定員

以王公大臣兼任 掌

圓明園翊衛之政令營總八人護軍叅領八人均旗各一人副護軍叅領十有六人旗各二人署護軍

叅領三十二人旗各四人護軍校百二十八人副
護軍校百二十八人均旗各十有六人護軍三千
六百七十二人旗各四百五十九人教養兵四百
八十人旗各六十人

凡翊衛於

圓明園周圍相度地勢建營房八處分旗駐劄

圓明園設堆鋪七十有六日以營總護軍叅領各二
人副護軍叅領署護軍叅領十有五人護軍校護

軍七百六十人守衛

長春園設堆鋪二十日以護軍叅領一人副護軍叅領署護軍叅領四人護軍校護軍二百人守衛

清漪園設堆鋪六日以副護軍叅領或署護軍叅領一人護軍校護軍六十人守衛恭遇

駐蹕靜宜園設堆鋪五十有一日以營總二人護軍叅領一人副護軍叅領署護軍叅領十有三人護軍校護軍五百十人守衛

暢春園設堆鋪十有九日以營總一人副護軍叅領署護軍叅領五人護軍校護軍一百九十人守衛
恭遇

車駕行幸官軍沿途清蹕隨時酌委

凡訓練步射騎射鳥槍步獵及軍政考驗均與八旗護軍營同又於八旗營房內各設學舍以繙繹生員六人充教習分教本營肄業子弟

凡升除總統員闕由本處奏請

特簡營總員關於本營護軍叅領及京中護軍叅領內
護軍叅領員關於本營副護軍叅領內副護軍叅
領員關於本營署護軍叅領內署護軍叅領員關
於本營護軍校內護軍校員關於副護軍校內均
由總統遴選擬正陪引

見補授副護軍校筆帖式均於護軍內護軍於教養兵
閑散壯丁內遴選均由總統考驗拔補

凡八旗牧養官馬三千一百十有二匹每遇

車駕巡狩需用官馬回時繳還一如京中八旗之制其
官員親隨兵養廉官軍優卹均與

京城同

健銳營

總統無定員

以公侯大
臣兼任

翼領二人前鋒叅領八人

副前鋒叅領八人署前鋒叅領十有六人前鋒校

五十人副前鋒校四十人什長五十人筆帖式四

人前鋒千人

副校什長筆
帖式均在內

委前鋒千人習雲梯馬

步射鳥槍馳馬躍馬舞鞭舞刀水戰駕船駛風之
技翼領督率所屬隨時訓練恭遇

巡狩視

京城護軍營官軍十分之二委叅副校士隨蹕

凡升補翼領員關於前鋒叅領內前鋒叅領員關於副前鋒叅領內副前鋒叅領員關於署前鋒叅領內署前鋒叅領員關於前鋒校內前鋒校員關於副前鋒校筆帖式內均由總統遴選擬正陪引

見補授副前鋒校闕由總統於筆帖式什長內選補什
長筆帖式闕於前鋒內前鋒闕於委前鋒內委前
鋒闕於教養兵開散壯丁及八旗驍騎教養兵內
教養兵闕於壯丁內拔補

凡官軍俸餉優卹親隨兵養廉均與

圓明園護軍營同

欽定大清會典卷一百



財團
法人
佛陀
教育
基金
會
釋淨
空
敬贈